

**Jesusa kamachisqan**  
**SANTO BAUTISMO**

Josef Imberg

SIEMBRA

Publicado por:  
© 2014 Editorial Siembra  
1ra. Edición en quechua

Título original:  
El Santo Bautismo: Un Sacramento de Vida.  
© 1981. Josef Imberg.  
Traducción al quechua, revisión y corrección:  
Mario Condo.

Dibujos:  
Marcelo Frías.

Editores: Centro Luterano de Educación Teológica (CLET), dependiente  
de la Iglesia Cristiana Evangélica Luterana (ICEL).

Editorial Siembra - Bolivia, es la Casa Editorial de la Iglesia Cristiana  
Evangélica Luterana ICEL, que confiesa a Jesucristo como Señor y  
Salvador.

Prohibida la reproducción total o parcial sin la autorización del editor.

Informaciones en:  
Centro Luterano de Educación Teológica (CLET)  
Zona Alto Tucsupaya. Barrio "Los Pinos"  
Teléfono: 6455069 Celular: 67602683  
Correo electrónico: lgap\_41@hotmail.com  
Casilla 288  
Sucre - Bolivia



## **PRESENTACIÓN**

La Iglesia Cristiana Evangélica Luterana en Bolivia bautiza niños; esta práctica no se acostumbra entre muchas iglesia evangélicas de nuestro país, pero en este pequeño folleto hablamos del sacramento de bautismo y por qué nuestra iglesia basada en la Biblia bautiza infantes.

Queremos agradecer profundamente a todos aquellos que hicieron posible la impresión de este folleto en el idioma quechua, especialmente al Misionero Noruego Ingar Gangas y a la Misión Luterana Sueca, que trabajaron junto a CLET para realizar la impresión y traducción de esta obrita. Es nuestro deseo que estas páginas sirvan a fortalecer la práctica del bautismo dentro las Iglesias Luteranas de Bolivia.

Ptr. Gonzalo Ascarrunz

Director CLET – Bolivia.

## SANTO BAUTISMO

Kawsayninchejpi uj jatun sacramento.

Kay librito bautismomanta parlan, doctor Martin Luteroj yachachiykunasnin, Catecismo Mayor nisqasninman jinataj kashan. Ajinapis wakin imas mana churasqachu kaypi, chaykunamanta wakin kajkunalla aswan sut'inchasqas kashanku; chantapis Iglesia Luteranaj creesqankuman jina qhelqasqa libromanta orqhospa kayman yapasqa kashan. Ajinaqa tukuy kayta ñawirejkuna usqhayllata umankupi jap'eqayta atinankupaj jina kashan.

*Cheqatapuni niyki: Sichus pipis mana yakumanta, Espiritumantawan nacen chayqa, Díospa reinonman mana yaykuyta atinchi.*



## 1. Kay Santo bautismoqa Cristoj kamachisqan.

Sapa uj cristiano yachanan tiyan imachus bautismo kasqanta; qallarisunchej Jesucristo bautismota kamachispa, nisqanwan: *“Chayrayku rispa, tukuy laya runasta yachachisqasniyman tukuchimuychej, bautizaspa Dios Tataj, Dios Churej, Dios Espíritu Santoj sutimpi. Yachachimuychej paykunaman imatachus noqa kamacherqaykichej chayta, paykunapis kasunankupaj. Chantá yachaychej, noqa qankunawan tuta p’unchay kasqayta, kay pacha tukukunankama”*, nispa. (Mateo 28:19-20).

Manaraj bautismo kamachisqa kashatin, Evangeliospi rikukullantaj waj bautizaykuna: *“Chantá Jesusqa yachachisqasninwan Judea cheqaman rerqa. Chaypi paykunawan qhepakorqa, runastataj bautizarqa”*. (Juan 3:22). Tumpamanta nillantaj: *“Manapis Jesuschu bautizasharqa, manachayqa yachachisqasnillan”*, nispa. (Juan 4:2).

Chaykamaqa manaraj kamachisqachu karqa cristiano bautismo nisqaqa. Pichus bautizachikuyta munajqa, bautizachikullaj; imaraykuchus manaraj kamachisqachu karqa chay bautismo tukuy runakuna salvasqa kanankupajqa. Jesucristo wañuchisqa, p’ampasqataj, wañusqakunamantataj kinsa p’unchayninman kawsarimorqa, Janaj pachaman ripunampachapitaj bautismo ruwasqa kananta kamacherqa.


Aswan ñawpajtaña nisqa, bautismonejllata Diospa reinonman yaykuna atikusqanta. Nerqa kay jinata: “...*Cheqatapuni niyki: Sichus pipis mana yakumanta, Espiritumantawan nacen chayqa, Diospa reinonman mana yaykuyta atinchi*”, nispa. (Juan 3:5).



## **Cristoj ajinata ruwaychej nisqan.**

Chay tukuypi yachanchej bautismotaqa Diospuni qosqa, kamachisqataj Salvadorninchej Jesucristonejta. Yanqhatachari pipis ninman runakunalla bautismotaqa wakichin nispaqa. Chayrayku bautismoqa uj jatun yachachiy kanan tiyan cristianoj kawsaynimpia. Diospa jatun yachachiykunasnin kashanku: Chunka Kamachiykuna, Credo Apostólico, jinallataj Tatayku (Padre nuestro). Mana runakunaj wakichisqallanchu. Ajinallataj bautismopis, kikin Diospa kamachisqan, mana ajina kajtinqa pantasunman, jinallataj mana salvasqa kayta atisunmanchu.


Arí, bautismoqa yakuwan ruwasqa kashan; ajinapis Diospa ruwasqampuni, palabrannejta kamachisqa kashan. Chayrayku Diospa kamachisqanqa mana qhasipajqa kananchu. Diospa kamachisqanqa jatun kanan tiyan, sumajtaj.



## **Cristoj qosqaykichej nisqan.**

Santo bautismoqa Diospa kamachisqampi samarin. Kay jinata nisqampi: “*Chantá yachaychej noqa qankunawan tuta p’unchay kasqayta, kay pacha tukukunankama*”, nispa (Mateo 28:20). Chayta nisqanrayku, bautismoqa tukuy imamanta aswan jatun. Bautismonejta Diosqa qowanchej: Salvaciónta, sonqochayta, Diospa qhasilla k’acha yanapayninta ima. Mana entiendesun chaypis palabrannejta ruwakusqampi creenanchej tiyan. Sichus kay k’acha qori jina jatun kaynimpiman mana entiendesunman chaypis, mana chay k’acha qori jina bautismo qowasqanchejpaj juchanchu. Chayqa noqanchej juchanchej mana entiendesqanchejrayku, nillataj munakuywan jap’eqasqanchejrayku.





*Bautismo yakuqa atiynejoy, Diospa  
Palabrampi, Sutimpi Ima.*

## **2. Santo bautismoqa sacramentosmanta ujnin kashan.**

Mana runaj bautizasqanchu kanchej, kikin Dios bautizawanchej. Runaj makisninwan bautizasqata rikukusunman chaypis, bautismoqa Diospa ruwasqampuni kashan. Cristiano bautismopeqa yakupuni kanan tiyan. ¿Chanta imaynatataj yakulla chay t'ukuna imasta ruwayta atinmanrí? Chay tukuytaqa Diospa Palabran Sutin ima ruwashan, chaypeqa salvación kashan. Bautismo yakoqa atiyuniyoj, Diospa Palabrampi, sutimpi ima, *wiñay kawsayniyoj yaku phujyuman tukun*, (Juan. 4:14). Bautismo “...*mayllawarqanchej Espíritu Santonejta, ujtawan nacespa mosoj kawsayniyoj kananchejpaj*”, (Tito 3:5). Kay ñawirisqanchejman jinaqa, chay bautismo yaku juchasninchejmanta llimphuchawanchej, watejmanta paqarikunchej mosoj runaman tukuspa, Espíritu Santonejta mosoj ruwaykunaman. Chay tukuy imataj ruwasqa kashan Diospa Palabrampi nisqasninwan. Bautismopi yakoqa kanampuni tiyan rikuyta atinapaj.



## **Yaku.**

Kay tukuy ima nisqanchejpi, yakumanta atisunman uj chhikan parlaywan sut'inchayta: Bautismopaj yaku wakichisqaqa, mana ujina yakuchu, yakuqa yakulla, Bautismopaj wakichisqa yakurí, bautizashawajtinchej *Santificasqa Diospa cheqa yakunman tukun*. Kayta nispa, tapukusunman: Chay uj chhika yakulla ¿Imaynatataj uj runata salvanman?, nispa. Ajinata tapukuspaqa Diosmantapis burlakushasunman jina kashan.

Bautismopeqa mana uj chhika mayqen yaku jinallachu kashan. Ari, chay yakuqa *mayqen yaku jinalla kanman, manachus Diospa Palabranwan khuskachakunman chayqa*. Bautismopi Diospa palabran mana t'aqasqachu kashan. Yakuwan, Diospa Palabranwanqa khuska ujllapi kashanku, ajinamanta

ruwakunampaj: *Uj Sacramento nisqa*. Ajina ujchasqa kashan chayqa, ¿Imaynatataj t'aqasunman yakumanta, chay k'acha Diospa Palabrantarí? Diospa Palabranqa mana mayqen runaj nisqan jinallachu, manachayqa Diospa parlasqan, atiy nin, Diospa sutin ima bautismopiqa kashanku. Chayqa qori jina, tukuy imamanta aswan jatun kashan.

### **Yakoqa uj jinaman tukun.**

Bautizana yakoqa mana mayqen yakumantapis ujina yakuchu. Mana nishanchejchu bautizanapaj waj laya yaku nispaqa. Bautizanapaj yakutaqa atisunman orqoyta mayqen pujoyllamantapis, chayri mayqen mayullamantapis, uyanapaj jina llimphulla kachun. Ima yakutachá uyanchej, chayri ñañakunchej, wayk'unchej ima, chaywan bautizayta atisunman. Chay kikin yaku bautismopeqa ujina, imaraykuchus chay yakuman Dios churan jatun kayninta. Chay bautismopi Dios Churan yakuman glorianta, atiy ninta, ima. Kay tukuy imaqa jamun Diospa Palabrannejta, cristiano bautismopi Dios qosqaykichej nisqanejta ima. Chayrayku, chay yakoqa mana mayqen yaku jinallachu. Diospa yakun, Janaj Pacha yaku, mana juchayoj, Paypa bendecisqan yaku. Chaypi tarinchej Diospa qhapaj imasninta, chanta atiy ninta ima. Maypachachus Diospa palabran, chanta Diospa qosqaykichej nisqampiwan yakuman ujchakun chayqa, *tukun uj Sacramento nisqaman: Kikin Diospa santo ruwasqan, chaynejtataj tarinchej mana rikukoj imasta, Dios qowanchej chay rikukoj imasnejta.*

*Bautismoqa uj  
sacramento, kikin  
Diospa santo  
ruwaynin.*



## **Mana rikukoj janaj pacha imas.**

¿Mayqenkunataj kashanku chay Diospa qowasqanchej, mana rikukoj imas? Chaykuna kashanku: Juchasnichejpa qhespichiynin, Espíritu Santo, Diospa reinonmanta kasqanchej ima. Chantá ¿imaraykutaj chay tukuyta qowanchej? ¿Imaynatataj uj juchasapa, “juchampi wañusqaman” (Efesios 2:1) chay tukuyta Dios qonman? Pichus bautizakojmanqa chay kikinpacha Dios jaywarin Jesucristoj ruwasqanta, Jesucristoqa millay juchasninchejrayku wañurqa, p’ampakorqa, wañusqa ukhumanta kawsarimorqa; ajinallatataj noqanchejpis bautismopi wañunchej, ajinamanta noqanchej nacenchej mosoj imasman, Jesucristowan khuska wiñaypaj kawsananchejpaj. Colosenses 2:12-13-pi, nin: *“Bautisachikuspaqa Cristowan p’ampasqa karqankichej, jinallatataj paywan kawsarimorqankichej Diospa jatun atiyinimpi creesqaykichejrayku. Qankunapis juchapi wañusqa kaspas aychaykichejpi mana circuncidasqa kashajtiykichej Diosqa qankunata Cristotawan khuska kawsarichimusorqachej, tukuy juchasniykichejta pampachaspa”*, nispa nin.



## **Rikukoj imas.**

Santo bautismo sacramento nisqapi yuyaspaqa, mana bautismopi rikukoj imasllapichu yuyayninchejta churananchej tiyan, Santa Cenapipis t'antawan vinowan rikukun, bautismopitaj yaku. Yuyaynichejmanqa churanallataj tiyan Diospa palabran tukuy rikukoj imaspi jatuchaj imasta ruwashesqampi.

Tumpatawan chayta entiendenapaj tata mamanchejkunaj kawsaynimpi yuyasun. Paykunatachus wakin runakunata jina qhawasunman: Makisniyojta, chakisniyojta, umayojta, ñawisniyojta, ninrisniyojta, umampi chujchasniyojta, chayqa; atisunman niyta: “Paykunapis tatay mamay jinallataj kanku, chayraykutaj paykunapis tata mamaykuna kayta atillankutaj”, nispá; manachayrí “ni pipis tataychu nitaj mamaychu”, nispapis. Maypachachus, tatanchejta mamanchejta qhawanchej,

Dios Tataj kamachisqanwan, maypichus nishan: “*Tataykita mamaykitawan jatumpaj qhaway, unayta kay pachapi kawsakunaykipaj, mayqen jallp’atachus Señorniyki Tata Dios qosunki, chaypi*”, nispa (Exodo 20:12). Chaywanqa tata mamaqa jatuchaj kasunapaj kasqankuman tukunku, manaña waj runas jinachu. Chayqa ruwakun Tata Diospa palabrampa kamachisqanman jina, junt’akusqanman jinataj. Tata mamaqa kikin Diospa jatun glorianwan pilluchasqas, jinallataj jatun kayninwan p’achallisqastaj kanku, tatas mamas kanankupaj. Ajinamanta ukhunchepi espiritualmente ujchay tiyan runa kasqanchejpi, Dios Tataj nisqanwan, chanta Palabranwan khuskachakojtin.

### **Dios jatumpaj qhawasqan.**

Bautismoqa jatumpaj qhawasqa, chayrayku kashan uj sacramento. Imaraykuchus Dios churan jatun kayninta bautismopi, glorianwantaj p’achallichisunki. Ajina kajtenqa, ¿imaynatataj pisipaj qhawasunman, yakullapi yuyaspa? Chayrayku, ama pantanachu yakuta t’aqayta Diospa Palabranmantaqa. Sichus t’aqasunman yakuta Dios Tataj palabranmanta chayqa, yakuqa mayqen yaku jinalla kanman. Sichus *yakuwan Diospa palabranwan khuskachasqa kashanku chayqa, uj santo sacramentoman tukun, chaytaj kashan uj bautismo cristiano.*





### 3. Santo bautismoqa kashan salvacionta qonawanchejpaj.

Jesús santo bautismota, ¿Imapajtaj kamachirqa? Kay tapuymanqa atisunman kutichiyta San Marcospa qhelqasqan Evangelioman jina: *"Pichus creejqa bautizachikojtaj, salvasqa kanqa."* nin (Marcos. 16:16). Arí, bautismoqa salvanawanchejpaj kashan. Uj runa bautizachikuspaqa, mana kay pachapi aswan sumaj runa kanampajchu kashan. Chayqa ruwakun uj yanapa kanampaj, runa salvasqa kanampaj. Salvacionta jap'ikunchej kikin bautismopi, wiñaypaj salvasqa kasunchej, sichus Diospa khuyakuynimpi sayasunpuni chayqa. Dios Tataj khuyakuynimpi sayayqa Espíritu Santoj pusaykachasqampi puriy kashan, ajinaqa Paypa reinompipuni kasunchej. Espíritu Santotaqa qowanchejña santo bautismopi. Ajinata ruwaspaqa, Diospa

wawallampuni kasunchej. Ujinamanta parlaspa: Niyta munan, tukuy juchamanta kacharichisqa kasqanchej, tukuy sajra imakunamanta, chanta wañuymanta ima, ajinamanta wiñaypaj Jesucristoj kamachisqasnimpi, reinompi ima kawsaspa.



### **Bautizachikusqamanta ñawpajman.**

Sut'i kashan bautismoqa, mana chay bautizachikunchej chay p'unchayllapichu imatapis ruwan, nillataj uj iglesia cristianaman ujchakusqanchejllapichu. Bautismoqa sapa p'unchay cristiano kayninchejpi waqaychawasun. Bautizasqa kaspapa sapa p'unchay kallpakunanchej tiyan, Supayta, juchata, wañuytawan atipayman. Uj cristianoqa sapa p'unchay juchasninmanta perdonta mañakunan tiyan. Chaywampis ¿imaynatataj, chanta imaraykutaj chayta ruwanman? Imaraykuchus bautismopiqa Dios khuyakuynimpi jap'eqañña, jinallataj Diosqa wawampaj

rejsikapunña. Perdonta mañakuspaqa Tatampa wasinman kutirimpushan: “*Tatáy, Diospa contranta juchallini, qampa contraykitapis*”, nispa (Lucas 15:21). Chay kashan Cristoj sutimpi juchamanta perdonta mañakoyqa. Cristo wañorqa noqanchejrayku, jinallataj Pay kamachiwanchej bautismonejta Tatampa wawasninman kutinanchejpaj. Ajinata Diosman kutirikuspaqa mañakunchej Espiritu Santota, Cristoj atiyinta, noqanchejpi kawsakunanta, imakunatachus qowarqanchej chaykunawan khuska.



### **Bautismomanta qhepa p'unchaykunaman.**

Bautismoj khuyakuynimpi sayanapajqa kallpakunanchej tiyan sapa p'unchay. Jinallataj yuyayninchejpi sonqonchejpi, bautismoqa uj jatun regalo jina kanan tiyan, chayman

jinataj kawsaspa. Ajinata ruwasun chayqa, bautismoqa kallpachawasun, sonqochawasun ima. Juchasninchejpa pawichiynimpis noqanchejman jamuchun, bautismoqa rikuchiwasun ñanta, imaynata Dios Tataj wasinman kutipunapaj. Noqanchej kikinchejman nisunman: “*Juchasniypa mancharichisqan kashani chaypis, bautizasqa kani. Mana khuyanapaj jina kani chaypis, Diosqa khuyawan, juchaymanta perdonawan.*” Chanta, nillasunmantaj: “*Kutiripusaj tataypa wasinman*”, nispa (Lucas. 15:18).

Bautismopeqa salvación ruwakun cuerpopaj, chanta almapaj ima: Yakuqa cuerpoman jich'aykusqa, Diospa Palabrantaj cheqanta espiritunchejman parlan. Ajinamanta bautismopeqa, yakuwan Diospa Palabranwan ujllaman tukun. Cuerpopi ruwan jatuchej imasta, chanta salvacionta qowanchej, Diospa reinonman pusaykuspa. Mana kanchu waj, qori jina k'achito cuerpopaj almapaj, bautismo jinaqa. Kay sacramentonejllata atinchej Diospaj t'aqasqa, bendecisqa ima kaytaqa. Noqallanchejmantaqa ni imaynamanta atisunmanchu chayman chayaytaqa, ni mashkha allin imakunata ruwaspapis.



#### **4. Creeyninchej jatun santo bautismowan kuskachasqa kaspá.**

Bautismoqa, mana chaypaj jina kashajtinchejpi, chaypi Dios qowanchej salvaciónninta khuyakuynimpi. Kayta uyarispa, uj tapukuy jamun: Jina kajtenqa, ¿Imataj kashan creeyrí? ¿Manachu imatapis ruwanay tiyan? ¿Manachu creenayraj tiyan salvasqa kanaypaj?, nispa. Arí, creeyninchejqá kanampuni tiyan; chaywampis mana creeyninchejpichu salvacionninchejqá kashan. Creeyninchejqá mana sapallan kayta atinchu. Nillataj creeyninchejqá qhasillamanta rikhurinmanchu. Creeyninchejqá noqanchejpi ruwasqa kanan tiyan, chaypi sayanapaj, atienikunapaj ima. Cristiano kasqanchejpi salvacionmanta yuyarinchej, parlanchejtaj chayqa, imapis kanampuni tiyan, chaypi yuyanapaj, parlanapaj imaqa. Chayqa Diospa ruwasqan, wakichisqan, niwasqanchej, imatatajchus noqanchejpaj churasqan ima kashan. Chay ruwayqa tarikun uj k'atallapi: Señorninchej Salvador Jesucristoj kawsaynimpi, ruwasqampi ima.

Chantapis, Jesucristo kamacherqa bautizasqa kananchejta. Salvasqa kayta munanchej chayqa, Pay rikuchiwanchej imaynatachus tarinata. Astawampis Paypuni kamacherqa imaynatachus chay bautismo ruwakunanta. Chaypaj mañarqa *yakuta*, *Diospa Palabranwan khuskachasqa kananta*. Kaywanqa mana pujllakusunmanchu waj jina “bautismosta” wakichisaj nispaqa.

Yakuwan Diospa Palabrantawan khuskachaspa bautismotaqa ruwana tiyan: Dios Tataj, Dios Churej, Dios Espíritu Santoj sutimpi. (Mateo 28:18-20). Creeyninchejqqa chaypi sayasqa kanan tiyan, Diospa kamachisqampi, qosqaykichej nisqampi ima atienikuspa. Ajinata bautizasqa kanchej chayqa, juchasninchej perdonasqa kasqanmantaqa, watejmanta paqarikusqanchejmantapis, ni imarayku iskayrayananchejchu tiyan. Ajinamantaqa Diospa qhawaynimpí mana juchayoj nisqa kanchej, Diospa reinonman churasqa, chanta Espíritu Santota ima qowanchej.



### ¿Creeyri, imapitaj kanan tiyan?

Kaykama tukuy unanchasqanchejpi yachanchej ñawpajpeqa mana creeyninchejchu jamun. Ñawpajpeqa Diospa kamachisqan, qosqaykichej nisqan ima jamun. Chaymantataj qhepampiraj

creeyninchejqá jamun. Diospa Palabrampi, qosqaykichej nisqasnimpi ima atienikuspa; chanta noqanchejrayku ruwasqampi, jinallataj imatachus qowasqanchej nisqampi ima sayaspa.

Sichus chay santo bautismopi Palabranwan, imatachus qosqaykichej nisqampi ruwasqaña chayqa, ¿Imaraykutaj creeyninchej kanampuniri? Uj niypeqa, mana necesariochu. Imaraykuchus chay tukuy imas Diosmanta jamun, ari, Payllamanta, Paypa ruwasqallan. Ajina kajtenqa, creeyninchejqá ni imatapis ruwayta atinchu, nillataj imatapis yapayta atinchu. Chayta allinta entiendinapaj ujta nisun: Sichus mayqempis makimpi qolqe jap'irisqa jamusunkiman, creeyniykeqa ni ima ruwanan kanchu kay qolqewan. Nillataj qosuyta munasqanwampis. Amapis yachaychu mashkha qolqechus kasqampi, chaywampis ñawisniyki qhawashan chay qolqe kasqampi; qosqayki nirusqanqa chaypi kashan, cheqapis kachun amapis. Chaywampis chaypi rikhurin creeyniykeqa: Papis qosqayki kay qolqeta nisunkiman chayqa, kayqa qanmanta creenayki chayri mana creenayki. Cheqamanta ¿qampata kanampajchu creenki, makiykita jaywarispa jap'eqanaykipaj?





Ari, ajina kashan, creeyninchej yaykun santo bautismomanta yachakushajtinchej. Pillapis Uj regalota qoyta munashawanchej chayqa, jap'ikunanchejpuni tiyan, mana creespaqa mana jap'iqallasunmanchu. *Regalota mana jap'ikusunman chayqa, qhesachasqa rikhurinman.* Reparasqanchejman jina, bautismonchejpiqa creenanchejpuni kasqa. Ch'uwata yachakunapaj, ujtawan ñawirisun Mr. 16:16-ta: “*Pichus creejqqa, bautizachikojtaj salvasqa kanqa.*” Nispa nin. ¿Ichari? Chaywampis, mana nisunmanchu bautizasqakanapaj ñawpajtaqa creenaraj kashan nispaqa. Imaraykuchus waj cheqapi, Diospa qhelqampi ujinamanta niwanchej: Mateo 28:19-20-pi, nin: “*Chayrayku rispa, tukuy laya runasta yachachisqasniyman tukuchimuychej, bautizaspa ... yachachimuychejtaj...*”, nispa.

Pichus bautizachikojqa, mana creeynimpichu sayayninqa, manallataj creesqanraykuchu chay bautismopi salvasqa kanqa.



### **Bautismoqa creenapaj.**

Diosqa noqanchejpi creenanchejtapuni mask'an, cristiano jina sayayninchejpi creeyqa kananpuni tiyan. Chaytaj niyta munan, mana pipis bautismota jap'iyta atinchu mana creey kajtenqa. Bautismoqa Diospa qhasilla munakuynimpi qowasqanchej. Chay regalota jap'ikuyqa Tata Diospa munakuynimpi creey kashan. Ujtawan comparasunchej chay regalo qowasqanchejta kikinchanapaj, runa masinchej imatapis qowasqanchejwan. Qowanchej qhasilla, tukuy sonqo, noqanchejmanta ni imata mask'aspa, ¿ichari? Ari, regalo chayqa regalopuni, mana imata ruwasqanchejmata pagochu. Chay regalota mana jap'ikusunman chayqa,

¿imataj kanman? Pichus regalajpa sonqonta nanachisunman, niñataj ujtawan imatapis qowasunmanchu. Jinallataj mana jap'ikuspaqa, regalonwan, paywan manakajpaj qhawasqa kanman. Jap'ikuspari rikuchinchej atienikusqanchejta: munakuyninta, khuyakuyninta ima. Jinallataj rikuchinchej, paywan allimpi kawsakuyta munasqanchejta. Kay tukuy imasqa yachachiwanchej, bautismowan creesqanchejwanqa ajinallataj ruwakun. Bautismonchejpi creeyqa, Diospi creey kashan, Pichus chayta qowajninchejpi.



## 5. Juch'uy wawakunaj bautismon.

Kaymanta parlaspa, wakin runakuna kay jinata ninku: “kunan waj p'unchaykuna kanku, tukuy imapis ujina”, nispa. paykunaqa tapukunku: ¿Mosoj Testamento yachachinchu

juch'uy wawakuna bautizasqa kanankuta?, nispa. Iglesiasj qallariynimpiri mana pikunapis churanakojchu kanku, juch'uy wawakuna bautizasqa kanankumantaqa. Ichus uj tapukuyllamanta parlarej kanku: ¿Mashkha watampitaj uj juch'uy wawa bautizasqa kayta atinri? ¿Kinsa watampichu? ¿Atinmanchu nacekusqanmanta qhepaman ima ratullapis bautizakuyta, chayri suyananchu kanman kinsa watankama?, nispa.

Juch'uy wawakunaj bautismonmanta iskayrayayqa, qallarín runaj yuyaynillampi. Ninku, “*bautizakojqa yachananraj imachus bautismo kasqampi*”, nispa; ajinallataj ninku, “*pay kikimpuni Diospa ñannimpi puriyta munanan tiyan*”, nispa. Nillankutaj, “*ñawpajtaqa creenankuraj tiyan, chaymantaraj Diosman kutirikunanku tiyan, qhepampitaj mañanqanku bautizachikunankupaj*”, nispa. Ajinamanta, bautismonqa kanqa uj marca jina, chayri uj señal jina, Diospata kasqanta yachanampaj, jinallataj Cristoj Iglesiampiña kasqanta yachanampaj ima, nispa ninku.

Ajinata qallarín juch'uy wawasta bautizajkunaj contrampi. Ashkha kuti parlanku, kay jinata: “*Juch'uy wawakuna bautizakushajtinkoqa, mana yachankuchu imachus bautismo kasqanta, nillataj ninkumanchu bautizachikusaj, chayri mana niytapis*”. Paykunaqa nillankutaj, “*Juch'uy wawakunaqa mana atinkuchu Diosman kutirikuyta*”, nispa.

¿Imaynatataj kutichisunman ajinata tapojkunaman,

yuyajkunaman ima? Chaykunamanqa kutichisunman, kinsa yuyaychaykunawan:

### **Ñawpajpi kutichisun, kay jinata:**

Jesucristoj Iglesiasian ¿imaynatataj iskay waranqa phisqa pachaj kuraj wataspi pantanman, imaynachus bautismo kasqampi? ¿Imaynatataj ciegos jina kankuman karqa Apostolkuna tiemponmanta kunan p'unchaykama, allin yachayniyoj runas yachanku cheqapuni bautismo kasqanta? Chay tapuykunaqa apawanchej waj kallpayoj tapuyman: ¿kikin Jesucristo bautismomanta kamachisqanmanta, pistaj astawan yachankuman? Kay tapukuymanta uj kutichiylla tiyan: ¡Apostolkuna! Sichus mana creesunman Apostolkunaj nisqasninkupi, qanchis chunka wata junt'a (100 d.c. watapi, Apostol Juan wañunankama) ruwasqasninkupi chayqa, ¿imaynatataj creesunman paykunaj nisqankupi, chanta qhelqasqankupi ima? ¿Imanisuntaj qallariypi iglesiaj ruwayninmanta (100 watamanta qhepaman) juch'uy wawas batizasqa kasqankumanta? pusaj chunka watata, paykuna chaymanta parlarqanku, yachacherqanku; chaypi mana creesun chayqa ¿imapiñataj creesun? Chantapis paykuna qhelqarqanku chay tukuy imakunamanta. Chay p'unchaykunapi Iglesiaqa bautizajpuni juch'uy wawakunataqa. Ni uj llajtallapis, ni uj obispollapis, ni uj iglesiallapis, ni uj runallapis nejchu, “*mana ajinachu*” nispaqa. ¿Imarayku? tukuy cheqapaj qhawarqanku, “juch'uy wawakunaj bautismontaqa”. Chay watasmantapacha

Evangelios nisqa qhelqaspi “juch’uy wawakuna bendecisqa” kasqankumanta, parlan: *“Saqeychej wawasta noqaman jamojta, amataj paykunata jark’aychejchu, imaraykuchus janaj pacha reinoqa, paykuna jina kajkunajta”*, nispa (Mateo 19:14; Lc 18:15-17).

Ajinamanta kikin Jesúsqa nisqan, yanapawanchej sut’ita jap’eqayta, imachus bautismo kasqanta: *“Dios Tataj reinonqa paykunajta (juch’uy wawaspata)”*. Diospa Palabrampeqa, mana maynejpipis nishanchu runa wiñay tukusparaj, Diospa reinonmanyaykunqankunispaga. Yachachiwanchej ujinamanta: *“Cheqatapuni niykichej, Diosman kutirikunaykichej tiyan kay wawaman jina tukuspa. Manachayqa, janaj pacha reinoman mana yaykunkichejchu”*, nispa (Mateo 18:3).



## **Iskay kaj kutichiy, kay jina kashan:**

Juch'uy wawaspa bautismonmanta tapukujkunaman, atillasunmantaj kutichiyta kay jinata: Juch'uy wawakuna “kuraj runa kanankukama” mana bautizasqa kananku tiyan nispaqa, Iglesia cristianamanta, chanta Diospa reinonmanta jawapi saqeshanchej. Ajina kajtenqa, “kuraj runa” chayri “yuyayniyojraj” kanankukamaqa, ¿Maypitaj kanqanku? Mosoj Testamentopeqqa chaymanta ni imatapis niwanchejchu. Ichus willawanchej “wasipi” tukuy nin familiapi bautizasqa kasqankuta, ajinamanta Iglesia cristiana ukhuman churasqa karqanku (Hechos 16:15,31,33,34). Mana maynejpipis parlanchu ujinamanta Dios Tataj reinonman yaykunata, mana bautismonejta kaspaga. Jesusqa nin: “*Sichus pipis mana yakumanta, Espiritumantawan nacen chayqa, Diospa reinonman mana yaykuyta atinchu*” nispa (Juan 3:5). “*Yakumanta Espiritumantawan nacen*” nisqanqa, parlashan bautismomanta. Ajina kajtenqa, ¿imaraykutaj jawapi saquesqa kanman uj juch'uy wawarí? Pikunachus juch'uy wawakuna bautismompa contrampi parlajkunaqa, iskay layamanta ninku: “*Juch'uy wawakunaqa cristianos jina jap'eqasqaña kanku tatasninkunejta, mana bautizasqa kaspapis; chantapis paykunaqa mana ni ima juchatapis yuyayninkuman jina ruwankurajchu*” nispa. Nillankutaj “*wawasqa, nacekusqankumantapacha Diospatapuni kanku, chayrayku mana bautismota necesitankuchu*”, nispa.

***Wawaspis juchayoj kanku; chayrayku  
bautizasqa kananku tiyan, ajinamanta  
Espiritu Santonejta nacenanku tiyan  
mosoj kawsayman.***





Sichus chay runakunaj nisqasninkuta, Mosoj Testamentopi nisqastawan rijch'anachisun chayqa, iskaynin kutichiyninkuta rikusun pantasqa kasqankuta. Juch'uy wawaspaj bautismonqa mana wajchu; tukuy runaspaj uj bautismolla. Rikunchejña Diospa reinonmanqa mana pipis yaykuyta atinchu mana “*yakunejta Espiritu Santonejta nacesqa kaspaga*” (Juan 3:5). Jinallataj, juch'uy wawa mana pay kikin ima juchatapis ruwanrajchu nispa nisqankoqa churanakushan *juchaj qallariyninwan* (pecado original). Chay yachacheyqa nishan: *Nacesqanchejmantapacha tukuy juchasapas kanchej. Chaymantapis astawanraj: Adampa tiemponmantapacha, tukuy runakuna juchasapas kanku: “Nacekusqaymantapacha sajra kani. Mamaypa wijsanmantapacha juchasapa kani”*, nispa nin (Salmos 51:5). Nishallantaj: “*Tukuy runas juchallisqankurayku, paykunaqa Diospa jatun kayninmpa k'anchayninta mana taripayta atinkuchu*”, nispa (Romanos 3:23). Yachanchej jina, juch'uy wawakunaqa nacesqanmantapacha juchasapas kanku, chayrayku necesitanchej bautizasqa kayta, imaraykuchus “*Payqa mayllawarqanchej Espiritu Santonejta, ujtawan nacespa mosoj kawsayniyoj kananchejpa*” (Tito 3:5).

### **Kinsa kaj kutichiy, kay jina kashan:**

Sichus bautismomanta parlaspas, nisunman “*sumajtaraj yachanay tiyan*”, “*sumajtaraj unanchanay tiyan*”, “*noqapuni ari ninay tiyan*”, nispa chayqa, Mosoj Testamentoj yachachiynimpa contrampi kashasunman. Imaraykuchus chaypi parlashan

*imastachus Dios noqanchejrayku ruwasqanta manaraj bautizasqa kashajtinchej, chanta imatachus noqanchejrayku bautismopi ruwasqantapis. Yuyasqanchej, ruwasqanchej, imatatajchus kunan ruwasqanchejpis, mana imachu kashan. Diospa Palabran niwanchej, kay jinata: “Maypachachus Salvawajninchej Diospa k’acha kaynin, munakuynintaj rikuchikorqa runasman chaypacha, Payqa salvawarqanchej. Chaytaj, mana noqanchej ima allinta ruwasqanchejraykuchu karqa, astawanqa khuyakuyninraykulla Payqa ajllawarqanchej Espiritu Santonejta ujtawan nacespa mosoj kawsayniyoj kananchejpaj”, nispa (Tito 3:4,5).*

Kaykama sut’ita rikuchiwanchej, tukuy imamanta astawan, santo bautismoqa Diospa ruwasqan kasqanta. Noqanchej ukhupi chay ruwasqaqa uj Sacramento kashan, chaynejtataj ruwasqa rikuchisqataj Diospa khuyaynin noqanchejpi. Jinaqa, Chay waj yuyaykuna: “Runa pay kikinmanta imatapis ruwananta”, “sumajta umapi imatapis jap’inanta”, “yachaynimpipi wiñasqa kananta” imaqa, mana Mosoj Testamento yachachisqanman jinachu kashan. Aswampis pantay yachachiykuna kashanku, kay pantay yachachiytaj iglesiaman yaykurqa, ajinamanta runasta iskayrayachispa, chantapis runasta paykunaj ruwaynillankupi atienekunankupa. Jinapitaj Diospa nisqanta tijraspa chayri qhesachaspa.

Juch’uy wawakunaqa bautizasqa kananku tiyan, famillapitaj chay wawitata Diosmanta yachachiyanku tiyan. Jesucristo

kamachiwarqanchej, kay jinata: “*Yachachimuychej paykunaman imatachus noqa kamacherqaykichej, chayta paykunapis kasunankupaj*”, nispa (Mateo 28:20).



## Uj kikinchaná.

Bautismomanta allinta jap'eqanapaj, entiendenanchej tiyan imaynatachus yachachinku Diosta mana rejsijkuna, chaypajqa allimpuni yachananchej imaynatachus rijch'anachin Ñawpa Testamentopi circuncision nisqatawan. Chayqa ruwasqa kanan karqa juch'uy qhari wawakunapi, nacesqanmanta qanchis p'unchayninman circuncidananku karqa Israel llajtaman yaykunampaj: Kamachisqapiri nerqa “pusaj p'unchayninman” circunsidakunan kasqanta (Levítico 12:3). Chay circuncisionqa ruwasqa karqa mana wawita Israel llajtaman yaykuyta “munasqanraykuchu”, nillataj Diospa nisqasninta jap'iyta

munani nisqanraykuchu; chaytaqa ruwananku karqa, Dios ajina ruwayta kamachisqanrayku.

Kunan p'unchaykuna, Mosoj Testamento tiempospi, Iglesia Cristiana ukhupeqa, mana kanñachu kamachisqa circuncisionta ruwanata. Chay circuncisión nisqaj lugarnimpi kamachisqa kashan bautismo ruwakunan. Chantapis bautismoqa mana qharisllapajchu. Kamachisqa kashan tukuypaj, qhari wawaspaj, warmi wawaspaj, waynaspaj, machu runaspaj ima. Mosoj Testamentopi sut'ita parlashan *bautismoqa mosoj circuncisión* kasqanta. Kay yachachiyqa mana mundo runaspa yuyaykunasninman jinachu kashan. Kay circuncisionpeqa mana kanchu ni uj parlayllapis imatachus ruwana, yuyana imaqa; jinallataj bautismopipis ajina parlayqa, mana kanchu.

Bautismopeqa Diospa khuyakuynillan, Paypa ruwaynillan kashan. Imaraykuchus nishan: *“Jinallataj paypi circuncidasqa kankichej, manataj makiwanchu, manachayqa Cristomanta kaj circuncisionwan. Aychaj sajra atiyinmanta kacharichisqa kaspá bautizachikuspaqa Cristowan p'ampasqa karqankichej, jinallataj paywan kawsarimorqankichej”*, nispa (Colosenses 2:11,12).



## **Kaypi ¿imatataj nisunman creeymanta?**

Creeyqa runaman iskay kutipi jamuyta atin. Ujpiqa bautizachikushajtin chayamuyta atin, juch'uy wawa kanman chaypis. Imaraykuchus chayqa mana mashka watayojchus kanamantachu: Juch'uy wawitata marq'ariykukuspa parlapayarishaspa asipayawanchej, chaypi reparanchej noqanchejpi atienekushasqanta. Chay atienekuyri mana umanchejpi mashkhatachus yuyayninchejwan kallpakunamantachu. Kikin Jesucristo niwanchej juch'uy wawakunaqa creeyta atisqankuta: "...*kay juch'uykunamanta noqapi creejkunata*", nispa. (Mateo 18:6). Jinallataj wawakunata bendecishaspa nillarqataj, Diospa reinonqa paykunajta kasqanta (Mateo 19:14). Chayta uyarispa, ¿pitaj ninman, juch'uy wawakuna creeyta chanta atienikuyta mana atinkuchu, nisparí?

Iskay kaj kutipitaj, chay creeymanta parlaspa nisunman: Bautismo velenampajqa mana creenarajchu kashan. Diospa ruwasqanqa pay kikimpi allinpuni cheqataj. Diospa qosqanqa valen amapis runaqa creechunchu. Diosmanta Qhelqasqa nin: *“Sichus payta wasanchasunman chaypis, payqa nisqanta junt'allampuni, imaraykuchus pay kikinta mana manachakuyta atinchu”*, nispa. (2 Timoteo 2:13). Creeyninchejqqa mana Diospa qowasqanchejmanta ñawpajtachu jamun, mana importanchu mayk'ajchus creeyninchej jamusqanqa. Kayqa yachachiwanchej, bautismopi chay kikinpachapis creey, chayri qhepamanrajpis pisimanta pisi crewaj chaypis, Diospa khuyayninqa kikillampuni.



6. Bautismopi Diospa k'acha khuyakuynin ;imaynapitaj chinkapunman?

Bautismopi imatachus qowasqanchej, chinkapunman bautismota pisipaj qhawasqarayku, Diospa kamachisqantapis pisipaj qhawasqarayku. Uj runa ña bautizasqaña karqa, qhepamantaj kawsaynimpi tentaciones jamojtin, santo bautismonta mana jatumpaj qhawaspa, waj imasman k'umuykuspa qhesachan, usqayllata saqerparispa.

Uj kaj mana bautismota respetayqa kashan, *iskayrayay*. Ari, runaqa qallarín iskarayayta imaynata bautismonejta Diospa wawan kayta, chanta Cristoj yachachisqan kayta ima. Chay runaj yuyaynimpi qallarín: “*Bautismollaqa manasina chaykama atiyniyojchu kanman*” nispa, “*ichapis waj imas kanman sumaj cristiano kanaypaj*” ninku. Jinaqa, mask'allanqapuni waj imasta, runasta, waj ruwaykunata ima, sumaj cristiano kayta munaspa, waj allin imas kasqanta yuyaspa. Pisimanta pisi, aswan jaqayman, ashkha imasta llamispa reparan mana imapis kasqanta payta yanapanampajqa.

Reparanqa chay mask'asqampi mana allin cristiano kasqanta. Sonqompitaj rikhurenqa q'enaqakuy yuyaspa tukuy imapis mana allin risqanta. Ajinamanta iskayrayayninqa astawan wiñan. Chantá pay yuyanqa Dios chay imasmanta mana allin sut'itachu nisqanta. Chaymanta qhepamantaj Diospa Palabrampi salvacionmanta nisqasnintapis manaña chhikata creeyta atinqachu, chayrayku sonqompi ninqa: “*Tukuy imaspi mask'ani Diospa munayninta ruwayta, manataj imapis sut'ichu, kunantaj mana yachaniñachu imapi atienikuyta. Tukuy imapis manapis*

*kanmanchu jina. Mana imapis allin sayanaypaj jina kanchu. Mana sina kanchu kaymanta imatachus ruwanaypajqa*” nispa. Tukuy chay imasqa, bautismopi Espíritu Santota qowasqachejpa contrampi churanakuy kashan. Ajinallatapuni yuyasun chayqa, Espíritu Santo ichapis saqerpariwasun.

Chay jina iskayrayayqa facilta waj runaman chimpanman, chay iskayrayaytaj kanman Diospa Simi nisqanta pisipaj qhawaspa, qallarinman tapukuyta: ¿Imaynatataj yachayman chay uj chhika yakullapi salavación kasqanta? ¿Imaynatataj Diospa Simi nisqan, Espíritu Santowan chay atiyta churanman yakuman juchasmanta perdonasqa kanapaj, Diospa reinonmantaj yaykunapaj ima? nispa. Sichus uj cristiano chay yuyaykunaman, chanta iskayrayayman, sonqonpi lugarta qonman chayqa, usqayllata waj cristianosman chay jina yuyaykunata chimpachenqa; Diospa wawanña kajta iskayrayachispa urmachinqa.





### **Pantaykunaqa waj jinasmantapis jamullanmantaj.**

Chay Iskayrayaykunaqa waj imakunamantapis jamuyta atillantaj. Nisunchej uj cristianoj kawsaynimpi creeyninta churasun allinta jap'eqanapaj. Payqa, Diospa Simi nisqanman jinapis kawsachun, Diosmanta mañakuspapis kawsachun, uj p'unchay paypa yuyayninman chayamun juchaman urmanampaj jina (tentación); jinataj urmampuni jatun juchapi. Chaypi bautismoqa payta atinman yanapayta, chantapis yanapanan tiyan. Bautismonqa payta yuyarichinan tiyan, paypaj perdón kashasqantapuni. Diospa Palabrampi nishan: *“Imatachus Dios qon chayqa, mana mañakapullantajchu, wajyan chaypis mana iskaychakunchu”*, nispa. (Romanos 11:29). Ajinata ruwanantaqa, chay runaqa pantaykun jatunta, pay kikinman kay jinata nispa: *“kaykamallaña cristiano kasqayqa, kaypi tukukun.*

*Manaña Diospa wawan kayta atisajñachu, imaraykuchus kay jina millayta juchallikuni. Mana qhepaman kutiriyta atiymanchu allinchanaypajqa” nispa.*

Ajinata may chhikas chinkanku. Chay jina millay juchata ruwaspa, bautismopi imatachus jap'isqankuta, yuyanku wiñaypaj chinkachisqankuta. Pantayninkuqa kashn qonqapusqanku bautismonejta Dios watejmanta wajyashasqanta, Tatampa wasinman kutimpunankupaj (Lucas 15:20). Chay chinkaj waynaqa, jatun juchasapa karqa, karuman ripuspataj, chayllamantaj kutimporqa, tatampa wasinman. Ajinallatataj, imaymana juchaman urmasqa kashaspapis, sapa ujnincejpaj tiyan uj ñan Dios Tataj wasinman kutirimpunanchejpaj.



## **Waj urmaykunapis kallantaj.**

Kayqa t'ukunapaj, uj cristiano juchaman urmajtin waj jina yuyaykuna umampi rikhurin, kay jinataj ninman: *“Juchaman urmasqayqa mana imachu kashan, wajkunaqa sapa kuti ajinata ruwallanku, jinallataj ruwashallankupuni”* nispa. Chanta ichus nillankumantaj, kay jinata: *“Imatachus ruwarqani, ichapis ujtawan ruwallasajtaj, chaywampis juchayqa kikillampuni kanqa, imaraykuchus juchasapapuni kani. May chhikata juchallispapis, qhepaman Diosman kutirikullasaj”*, nispa. Ajinata ruwaspaqa, manaña p'enqakonqachu, nitaj sonqonta nanachikonqañachu; chayraykutaj Diosman kutirikuyta yuyasqan, perdonasqa kayta munasqampis yanqhalla kanqa. *Juchasapa* kaynenqa qhepakapun *juchasnimpi*. Paytaqa Espiritu Santopis saqerpayanña, manataj kutimonqachu, tukuy sonqo Diosman kutirikunankama. Chayqa yachachiwanchej, pillapis bautizasqa kajqa manchachikunan kashan juchaman urmaykuyta, jinaspataj sinch'ita sayayta munanan tiyan, juchaj contrampi maqanakuspa, mana urmanampaj. Sapa uj cristiano sumajta qhawakunan tiyan, sajra sonqompa ch'awkiyaykunasnintapis.

Kallantaj waj pantasqa ñan, bautismopi Diospa khuyakuyninmanta pantasqata yuyaynimpi unanchaspa: imachus creey, chanta imatachus chay creey ruwasqampi ima. Uj runa jatun juchaman urmaspa, kayjinata atinman yuyayta: *“Kunanqa, bautismopi jap'isqayqa tukukapun.*

*Diosman kutirikuyta munaspaqa juchayta saquespa, creenay tiyan; kay creeynillay atenqa yanapawayta” nispa. Ajinata yuyaspaqa pejtuykushan. ¿Imamantataj Diosman kutirikunqa? ¿Imapitaj creenqa? Diosman kutirikuyninqa chaypi kashan, imaraykuchus chay juchasapaqa bautismoj khuyakuyninmanta urman. Ajinaqa creenan tiyan, Dios bautismopi qosqaykichej nisqampi. Chayqa valenraj. Tatampata wasi punkusqa kichasqallapuni kashan, “ajina millay kawsaypi tukuy qolqenta mana kajpi tukuchishajtimpis chay khuchista michishaspa misk’ita mikhuykunampaj jina qhawashajtimpis”. (Lucas 15:13, 6, 20).*

Aswan allin kashan, creeyninchejta maynejpichus kananman churanaqa. Cheqapipuni creenanchej tiyan Dios Tataj khuyakuynimpi; imaraykuchus Diospa qhasilla k’acha yanapaynintaqa bautismopiña rikuchiwarqanchej, kawsayninchejpi. Chantapis “Mana creespaqa mana atinchejchu Diospa ñawpaqempi allimpaj qhawasqa kaytaqa”, (Hebreos 11:6).

Chaywampis ichus runaqa, creeyninta pantasqata jatunchan. Yuyananchej creeyninchej aswan kallpayoj kasqanta Diosman ñanta kicharinampaj. Ajinamanta bautismopi Diospa ruwasqanmanta nisqaqa creeyninchejpa ruwasqan aswan jatun, ajinamanta creeynillanchejpi astawan atienekunchej, Diospa atiyinimpi, Diospa bautismonpi atienekunanchejtaqa.



## 7. ¿Imaniytataj munan bautismopi Diospa qosqampi kawsay?

Cristiano kawsayninchejpeqa tuta p'unchay wakichisqallapuni kananchej tiyan, tentacioneswan, juchawan, sajra aychanchejwan, maqanakuyipi atipanapaj. Ajinata ruwaspaqa bautismopi imatachus jap'isqanchejta ruwashanchej, jinallataj Diospa wawan jina kawsashanchej. Uj niypeqa chayta ruwayqa atina jinalla kashan, imaraykuchus Dios noqanchejwan kashan; chaypajtaj Dios niwanchej, noqa kallpata qosqaykichej nispa. Payqa ashkha yanapata qowanchej, chaykunaqa armas “Dones” nisqa noqanchejpaj kashan, atipanapaj. Chay maqanakupi tinkuyrí mana atina jinallachu kashan. Contrachejpi ashkhas rikhurisqanrayku, kikin sonqonchejpi sayaykun noqanchejwan maqanakuspa, enemigonchejman tukuspa.

*!!!Maytapuni  
chejnikuyki,  
wañuwajpis!!!*



## **Noqanchejpipis kashan uj enemigo.**

Sonqonchejpi chay enemigo sutichasqa kashan, “mawk’a Adán runa” nisqa. Cheqan ñanmanta t’aqakuspa, Diospa enemigonman tukurqa. (Génesis 3:6; Romanos. 3:6, 5:12). Chay “mawk’a Adán runaqa” noqanchejpi millay imasta ruwayman aysasqa kashan; chaymanta parlashan Diospa Palabran: “*Sut’i kanku aychaj ruwasqasnin*”, nispa. (Gálatas. 5:19). Chay ruwasqasnimpi tarinchej kaykunata: Khuchichakuy, millay puriy, lanti yupaychay, layqa kay, chejninakuy, maqanakuy, tumpanakuy, t’aqanakuy, waj yachachiykunata kasuy, envidianakuy, machakuykuna, chantá waj millay imaspiwan. Chay “mawk’a Adán runaqa” bautismopi sarusqa wañusqataj, chaymantataj rikhurin “mosoj Adán runa”. Jinapis chay mawk’a Adán runaqa, sapa p’unchay kawsarimuyta munan; chaypajqa sapa p’unchay sarusqa chanta wañuchisqa kanan tiyan. Chayta ruwananchejpaj bautismonchejqaj wajyawanchej: “*Ñawpa sajra kawsayniykichejpi karqa, chay mawk’a runamanta t’aqakuychej, imaraykuchus chayqa sajra munaynimpa atipasqan, ch’awkiyasqantaj. Qankunaqa mosojman tukuychej sonqoykichejpa yuyaynimpi. Chay mosoj runa kaywan p’achawan jina p’achallikuychej, mayqenchus Diosman jina ruwasqa, cheqan kaypi, cheqamanta santo kaypiwan kashan, chaywan*”, nispa. (Efesios 4:22-24).

Chayqa niyta munan, makisninchejman Dios churan allin armasta, chay millay imasmanta jark’akunanchejpaj (Efesios

6:10-20). Tukuy imamanta astawanqa, yuyayninchejpi, sonqonchejpi, siminchejpi ima, kanan tiyan: Diospa Palabran, sacramentos, chanta Diosmanta mañakuypiwan ima. Imaraykuchus mana ni mayqen creyentepis atinmanchu kawsayta mana chaykunawanqa. Jinallataj Diospa wawasnin kajkunaqa yanapanakunankupuni tiyan tukuy imapi. Chay kashan uj allin yachachiy, tukuy *“uj sonqolla kawsakunapaj”* (Efesios 2:17-22).



### **Bautizasqa kasqanchejmantapacha yanapa kashan.**

Bautismoqa yuyarichillawasumpuni, Diospa “wasinmanta”, cristianospa k’acha familianmanta kasqanchejta. Chanta



yuyarichiwasun Dios qosqaykichej nisqasninta, allin armasta ima, juchawan maqanakunapaj. Cristoj iglesiampi ima ruwanayojchus kanchej chayta ima. (Romanos 12:1-8). Ajina yuyaywan kawsasun chayqa, mana may kasqanchejta yuyakujchu kasunchej, manachayqa llamp'u sonqos kasunchej, ajinata Tata Diospa Palabran, nin: “... *sapa uj pay kikinmanta maychus kasqallanta yuyakuchun, Dios sapa ujman creeyta qosqanman jina.*” (Romanos 12:3).

Juchaman urmasunman chayrí, ¿imatataj ruwasunman? Tukuy imamanta astawanqa Diosman kutirikusun, mana q'ayachu, nitaj mayk'ajpis atikusqanman jinachu, “usqayllata kunanpacha”, juchallichiwajnincej yuyayninchejman churanman, q'ayalla ninapaj, ama kasunachu *usqayllata* Diosman kutirikuna. Chayta ruwasun cheqamanta tukuy sonqo, Diosman kutirikuspa juchasnincejta willakuspa. Juchasnincejta willakoyqa ichus iskay layamanta kashanman:

Uj layaqa kashan, sapanchejpi ima juchatachus ruwasqanchejta willakuy, perdonanawanchejpaj. Iskay kaj layataj kashan, Jesucristoj wakichisqan, chaytaj qosqa kashan iglesiamanta pastorkunaman, paykunaqa iglesiapi guardias “makimpi llavewan” jina kashanku, “Janaj Pacha reinomanta llavesniyoj”. (Mateo 16:19; Juan 20:23). Paykunaman juchasnincejta rimarijtinchejqa Dios perdonawasun. Chaypajtaj pastoresqa tapuriwasunman: “Creenkichu noqaj perdonasusqayqa Diospa perdonnin kasqanta?, nispa. (Catecismo Menor de

Lutero) Cheqa kashan, pichus juchasninta willakoj creeynin kallpachasqa kanampaj, *ajinamata creenampaj chay juchasnin cheqamanta perdonasqa kasqampi*. Chay k'acha willakuy (confesión) nisqaqa wakichisqa kashan, Diospa wawasnin bautizasqa kajkunapaj. Chayrayku kayqa sutichasqa kashan “kinsa kaj Sacramento”, nisqa. Chaytaj kashan jatun yanapa Diospa wawasnin jina kawsakunapaj, jinataj chaytaqa ruwanapuni.



### **Ñawpajmampuni qhawaspa.**

Mashkha kutis juchasninchejqqa qhepata qhawachiwanchej, sajra ruwasqasninchejta rikuchispa, chaymantataj Diosman kutirikuspa, chay pasaj juchasta Diosman willakuspa. Jinallataj unanchaspa qhepata qhawarinchej bautismopi chay jatuchaj imasta Dios qowasqanchejpi: Ajina yanapa kajtenqa allin qhepata qhawarinaqa.

Ajinaqa, mana iskayrayaspa, aswan sumajpuni bautismoqa ñawpajman qhawariyta yanapanawanchejq. bautizasqas kasqanchej rayku, Diospa qosqaykichej niwasqanchejpi, Diospa Reinonmantaña kanchej. Chayqa yuyayninchejman apamun: Qhepapi kaj imasqa qhepapiña kasqanta; ñawpajpitaj kashan Cristoj Reinon wiñaypaj, Janaj pachapi jatun k'ancha ima. Chay kashan noqanchejpaj ñawpajpi kawsayninchejq. Chay Reinomantaña kanchej, imaraykuchus ajinata nishan Diospa Palabran: *“Kay pachapeqa mana wiñay llajtayojchu kanchej, manachayqa jaqay jamoj llajtata tukuy sonqo suyashanchej”*, nispa. (Hebreos 13:14). Ajinata chay santo llajtanman wajyawanchej, wiñaypaj kawsayninchejman, chaytataj munanchej taripayta. Manaraj chaypichu kunitan kashanchej chaypis, *kallpakuspa ñawpajman rishallanchejpuni t'inkata jap'inanchejaj Cristo Jesuspi, (Filipenses 3:12)*.

Gloria kachun Dios Tataman, Dios Churiman, Dios Espiritu Santoman, imaynachus qallariypi karqa, ajina, kunampis, wiñaypajtaj. Ajina kachun (Amén).

